

QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum, die Jovis vigesima-prima
Junii, 1703.

M. PETRO POURRET
unici Regis fratris Medico ordinario, Doctore
Medico Præside.

An in raro corporis habitu vita felicior?

I.

SANITAS, optimum vitæ suavioris, & felicitioris condimentum, functionum animi & corporis integritas; non solum sita videtur in laudabili partium similium temperie, legitimâ organicarum structurâ, amborumque unionem, sed & in convenienti machinæ vascularis, sanguinisque motu circulari, quo cessante, præpedito, aut quâvis ratione perturbato pervertitur illa. ab hac consensus unus, confluxus unus, conspiratio una in singulis corporis partibus advenit. Insigniores tubuli, arteriæ è corde contracto sanguineum laticem vehunt ad omnes partes, venæ arteriæ nempe reflexæ, superstitem revehunt ad cordis scaruginem, qui ab eodem dilatato excipitur, iterum incudi redditurus, ita, & reditu frequentissimo perficiendus. à curvaturis arteriarum prodeunt nervi spiritus animalis delatores, vasa lymphatica, biliaria, renalia, pancreatica, quæ glandularum, ex arteriarum divaricatione, intertextu, & plexu prodeuntium ope lympham, bilem, serum, & liquorem pancreaticum in proprias sedes devehunt. Hujus machinæ motus perennitate stat vita, egregium sanè munus! felixque corporis valetudo, quo nihil optatius! jugis auxilio circulationis, trituræ, & secretionis assidue, sicut & aëris salutaris commercii, ejusdemque elateris, respirationis, & transpirationis authoris. Vita permansio est caloris in humido, cujus perennitas, nullâ reparabilis arte ab ejus pendet constantiâ, & salubritate, quam in raro corporis habitu feliciorem reddit aëris ubertas, & liberior fuliginum exitus. Tribus vita sustinetur cibo, potu, & spiritu: citò tamen pede labitur ætas, nec bona tam sequitur quam bona prima fuit; assiduam enim Sanguinis & Spirituum jacturam omni ex parte alimenta reparare non possunt. Vita illicis, quercus, & quarundam aliarum plantarum longevior perhibetur, brutorum brevior, longioris inter hæc vitæ creduntur cervi, corvi, & alia quædam. Inter homines priorum mortalium ætas longa, nostra brevior. Qui rarum corporis habitum naturâ sortiuntur perfectiores edunt actiones, causisque morbificis firmius obstant, salubriorem idè, diuturniorem & feliciorem vitam ducunt.

CUM excrementorum proventus vitæ muniis & felicitati plurimum obsit, quod puriora sunt, & à supervacaneis succis liberiora corpora, eò minus ægrotant, salubriusque degunt: quæ verò multis scatent excrementis deteriori fruuntur valetudine, ut pigri, somnolenti, gulæ & vino dediti, litterarum cupidi, helluones librorum. Cum verò minor adest excrementorum cumulus, eò firmior, beatiorque valetudo. Sic rustici urbanis, montani vallium incolis, maritimi mediterraneis, calidarum regionum incolæ iis qui frigidas habitant, non causariam, sed firmiorem vitam ducunt. Ita sobrii, qui canâ brevi utuntur, uno verbo qui medicè vivunt, leviores salubrioresque redduntur: quemadmodum qui raro corporis habitu à naturâ donantur; quandoquidem multiplicem proloviem excrementitiam per patentes musculosi habitûs, & cutis poros expellunt sensibilibiter per sudores, & fuligines, & insensibiliter per halitum insensilem, hinc nativus calor ventilatur & fovetur, quod maximum roboris & sanitatis subsidium est. Undè nam verò suppetat tanta illuviei Sarcina. Accusanda videtur laboris nativi imbecillitas quæ languet à nimio otio, vitâ deside, à nimio quoque motu exsolvente, sæpè ex incautâ vivendi lege! an per plures dies sine cibo & potu vivere potest homo *ὁ δὲ ἀνὴρ ἐν ταύτῃ τοιούτῳ* *ἀνθρώπου* hominis vita septem dierum numero circumscribitur: aëre vix momento carere posse certum est: viventem enim respirate tam necesse, quam respirantem vivere. Quare animantium corpora undique circumfusa sunt spirabili aëris naturâ tantoperè veriegatâ; extenuatus quippe in sublime fertur, concretus in nubes cogitur, humoremque colligens, terram irrigat imbribus, tum effluens huc & illuc ventos efficit, annuas frigorum & calorum facit varietates, spiritique ductus sustentat homines, cisque vitalem præbet spiritum, fumosaque spiritus & caloris nativi supervacanea decerpit, suâque substantiâ & dotibus spiritus, humores, partiumque substantiam afficit, Serenus, tenuis, temperatus omnibus conducit. Temperie cæli corpusque animusque juvatur, spiritus siquidem nostros recreat, sanguinem attenuat, corpus omne pervadens raritate diffundit, fuscitatoque calore appetentiam, concoctionem, supervacuarum dissolutionem, expurgationemque promovet; ut crassus, densus, caliginosus, & alienâ permixtione inquinatus spiritus obscurat, sanguinem & humores densat, corpus aggravat & calorem opprimat.

III.

RARUS corporis habitus à calidâ & humidâ, aëreâ & spumosa seminis, viscerum & molis sanguineæ temperie oriundâ, affectio dicitur corporis in quâ rarefactæ musculorum carnes, & cutis ipsa (tactus universi corporis organum, tegumentum, atque emunctorium) nequaquam solida, ac densa, sed crebris apertisque foraminulis instar cribri pervia existit. Hæc rarior densiori præferenda vitæ compendio utpotè morborum feraci. Quare ubi sanguis peccat copiâ gemitque natura sub pondere, si diffletur, vix nociturus erit. Cutis rara tactu subtilior non solum, sed firmiorem constitutionem, cujus est indicium ab omnibus præstat injuriis securiorem: hæc temperata mediam inter carnem & nervum naturam adepta. Per illius insensiles poros fit ea, quæ sola pluribus sufficit ad vitam animalibus, ut insectis, & vermibus, aliisque perspiratio, quam non parùm juvat perennis Vasorum motus. Per hos cutis meatus nemo non videt euntes fuligines ut vaporem fumosum; facilis quippè egressus fuliginibus & aëri aditus, qui calorem nativum jam repurgatum fovet & alit,

laticemque sanguineum mirabili elatere excitat & impellit cum totâ machinâ.prehenditur rarus habitus ex latis venis, magno pulsu, planis & crassioribus pilis, ingenii perspicaciâ, sensuum vigore, hilaritate animi, facili ab externis injuriis læsione ab internis difficili, propensione in sudorem, sanitatis firmioris diuturnitate, citâ & brevi à morbis convalescentiâ, alvi & urinarum pariori evacuatione. Cum verò à naturâ instituitur perspiratio ad flabellationem aëris & recrementorum expurgationem; respirationi (ad mixtas actiones pertinenti) analoga censetur cujus utrunque vices gerit in fœtu, ubi vasa umbilicalia pulmonis feriantis vicem gerunt, in adultis verò unâ cum respiratione ad corporis ventilationem. & sanguinis impulsione non mediocriter inservit. Respiratio motus est diaphragmatis, musculorum intercostalium & fibrarum quibus contextuntur pulmonum vesiculæ inspiratione, & expiratione constans ut aëri pateat aditus pulmonibus sanguinem repurgaturo ejusdemque motum promoturo. ad primi mobilis cæli archetypi, imitationem quod circulariter movetur.

I V.

NON solùm prudenti Medico attendenda adjectio & detractio sub sensum cadens sudoris, urinarum, dejectionum, & sputorum, sed & insensibilis transpirationis evacuatio, quæ sola abundantior est reliquis sensibilibus simul junctis: ita ut si quis sumat cibum & potum ponderis octo librarum unicâ die transpiratio insensibilis ascendere solet ut plurimum ad quinque libras circiter pro ratione naturæ, temperiei, habitûs, exercitii &c. respiratio verò ad selibram ut observatum fuit ex guttis in speculo ori appposito ab exacto computatore Patavino affirmante plura unicâ die excrementa per insensibilem halitum, & cutis poros evacuari, quàm per reliquas sensibiles evacuationes quindecim dierum spatio; idque probatur facili ex ponderatione corporum & excrementorum. Insensibilis & oculis penè imperceptibilis videtur perspiratio; facilis tamen cognitu Medico, qui, quantum halitûs & fumi in die exhalet & diffletur, securo artificio librare novit & ponderare; ita ut qui solitò graviorem se sentit, huic suppressa suspicanda perspiratio, qui se leviolem liberalior illi successit: quò subtilior illa, eò salubrior; eò pejor quò parcior. **Q**ui cibis multum nutriendis utuntur perspirant copiosius, qui in aëre frigido, æstuoso; humido, locis à vento tutis degunt, iis parcior transpiratio sicut & pinguius quibus mens obtusior & corporis habitus frigidior quàm gracilibus, senibus quàm pueris. Fætor inguinum & pedum, & fœtida totius corporis exhalatio, calidorum & humidorum corporum crudis succis refertorum argumenta sunt, non aliter quam fætor alarum; ubi interdum creditur valle sub alarum trux habitare caper.

V.

IN densiori corporis habitu languet perspiratio ut in plerisque mulieribus, Iobesis potissimum & in astricta cutis hominibus; hinc fit ut excrementa halitiosa, suppressa & cohibita plethoram, alteram motborum parentem, inferant, s. liginosa diuturniori morâ acriora reddita fermentationes febriles, multa & copiosa gravia symptomata cephalica, ut & caloris nativi suffocationem invehant. In raro è contrâ corporis habitu per poros apertos, & patentes, arteriæ ad cutem desinentes facili & placidè halitus explodunt & fuligines (pilorum, morum, & humorum indicum materiam) ita aërem externum admittunt sanguinem promoturum & universum corpus eventilatum, quia

aër non dissimili ratione putrescit ac cætera omnia, excepto igne. Hinc quoque fit, ut qui sanguis copiâ peccat gravia non inferat detrimenta, si diffusetur, & putredinis vitia perspirationis libertate irrita reddantur; caloris nativi oppressio naturæ inimica dematur, si gementem sub pondere cimbam ventilatione sufficienti levaveris. Jure igitur optimo calidi & humidi fœliciores & salubriores audiunt, non ab ingenio quo cedere possunt atrabiliariis, quorum splendor siccus animam illuminat: Sed firmiori totius corporis valetudine vitæque diuturnitate atque fœlicitate quam debent potissimum transpirationi. Frigidâ & siccâ è contra temperiè donati senectutem non attingunt, vixque adolescunt, cum exiguus eorum spiritus sufficienter non perspiret. Cavendum quoque ne præpostera vivendi ratio naturæ destruat dotes, habitumque corporis nativum immutet. Fœlicior omnino eorum conditio, qui ἀεισπαρίως quam ab ortu Contraxere tuentur, cujus beneficio recreatâ expurgatâque ritè corporis circumferentiâ, referatis & patentibus viis, restitutâ spiritibus, sanguini & reliquis succis eundi redeundique libertate, famis & sitis naturalis vicissitudo, chili in ore præparati, ventriculo, intestinis tenuibus, venis lacteis, canali thoracico, sanguinis in vasis, corde, pulmonibus, aliisque partibus ita, redituque multoties, in singulis horis, repetito perfectâ Elaboratio spirituum, laticisque nervosi, in corticali cerebri, cerebellique substantiâ & reliquarum partium, ut & principum & patritiarum cerebri, cordis, pulmonis, & testium generationi dicatorum optima dispositio, sanitas firmior, diuturnior & fœlicior exurgit.

Ergo in raro corporis habitu vita fœlicior.

Domini Doctores disputaturi.

M. Petrus Marais.

M. Joannes Baptista Dodart, Serenissimi ducis Aurelianensis primarius Medicus.

M. Claudius Quartier.

M. Carolus Contugi.

M. Philippus Douté.

M. Michaël de la Vigne.

M. Franciscus Vetrage, Decanus.

M. Amandus Douté.

M. Petrus Perreau.

Proponebat Parisiis PETRUS SARTON, Graciacus,
Baccalaureus Medicus. A. R. S. H. 1703.

Apud Viduam Francisci Muguet, Regis & Facultatis Medicinæ Typographi.